



*Senin, 04 Oktober 2021*  
**Ogen: Esekiel 16:35-43**



**Lupa Nandangi Perbahanen Dibata**



**P**usuhta seh sedakna kune si kelengi kita ngelupakan kerina perjuangan, perbahanen seh ku pengorbanen silakoken guna kiniulin kegeluhenna. La terjeng si e ibahanna pe kai si petembil ras sura-suranta. Mekatep kal enda erbahanca ceda ateta.

Dibata pe seh kecewana ngidah perbahanen bangsaNa si lanai nembah alu tutus man baNa. Ibahanna dibat-dibata sideban dengen isembahna. BangsaNa enggo ngegah i bas IA nari. Ngegah ia janah ilupakenna kerina perbahanen Dibata e. Enggo ngenan akapna dibata-dibata sideban si labo itandaina. Ngidah si enda kerina merawa Dibata e maka iendesken Dibata me ia ku teruh kuasa bangsa sideban si ngerontasken kerina inganna nembah dibata-dibata sideban. Sabap Dibata merawa dengen ernembah ate nandangi anak-anakna si la setia man baNa.

Arah renungennta wari enda ibabai kita guna terbagesen ngukuri, kerna lagu langkahta. Enggo nge lalap si inget kerna perbahanen rikut ras Kata Pedah Dibata i bas krina paksa ras ingan. Me labo terjeng kebaktin minggu, Pjj, PA kategorial ras ibadah-ibadah ngenca si inget kerna Kata Dibata, janah i bas wari-wari sidebanna lupa kita maka kita enda me anak Dibata. Enggo seh buena Dibata encidahken kekelengenna man banta, subuk i bas paksa kita sehat, entah sakit, senang entah erceda ate si gejakpen maka la pernah ilupakenNa kita. Engkai maka kita ngelupakan IA. I gereja anak badia, i bas kegeluhen si tep-tep wari umpanana bas pendahin la teridah anak Dibata tapi anak doni. Ingetlah kerna pedah Dibata ibas kerina paksa i bas kegeluhen enda sabap e jadi persinget, senjata dengen si mabai kegeluhenta aminna ku ja pa pe kita lawes dengen i ja pe kita tading. Ibadah si tahu-tuhu e me kegeluhen si teptep wari.